

COSNAN A CUMINZA MUSTRA BON PA BETA HOTEL

ORANJESTAD (AAN): Segun Ministro Presidente Nelson Oduber a relata ayera, tur cos ta mustra cu prome cu 15 di Februari nan lo trata di yega na solucion definitivo pa garantia.

Gobierno a reuni Diahuebs cu doñonan y tambe esnan interesa pa proyecto di Beta Hotel. Ta conoci cu Aruba tin hopi preocupacion mas bien pa sa con ta termine.

Ta asina cu Ministro Ing. Briesen, Ministro Ing. Lacle y Ministro Oduber a reuni cu tur e personanan aki pa mira si por yega na un solucion pa termina e hotel.

Ta bon pa menciona cu si e Hotel no ser termina, toch e cuentanan di cobranza si ta sigui dreña Aruba.

Gobierno a papia hopi cu e promotornan Associated Architects y ALBO hunto cu grupo renombra di Venezuela (Buenavista) cu tin

capital grandi disponible, kendenan ta interesa den escenario di 20 millon Dollar pa termina e Hotel. Ademas nan kier pone equity acerca di 5 millon Dollar.

Gobierno a bisa nan cu esaki ta mucho hopi, y despues a bini cu proposicion di equity di 10 millon Dollar. Gobierno pues mester duna e suma aki so pa termine y haya aprobacion di Staten pa haci tal.

Ministro Presidente a relata na prensa cu nan tin contacto cu dos grupo pa participa cu equity. Un di e gruponan aki ta di Texas hopi influente y sigur si bin Aruba ta inversion positivo.

Pero principalmente Gobierno su plan ta pa mas pronto posible ricibi proposicion pa e finalizacion di Beta Hotel.

Ministro Presidente Nelson Oduber a bisa: "Ohala esaki ta e solucion e ora nos

por bisa cu tur 3 hotel ta riba bon caminda pa finaliza."

Un biaha mas el a bolbe subraya e hecho cu cada dia cu e hotelnan no termina, Gobierno mester paga. Cobranza a bini recientemente pa interes di 1990 pa 1991 di 675.000 Dollar. Otro cobranza cu a dreña tabata 719.000 Dollar, pues si agrega e dosnan aki hunto e ta yega na casi 3 millon Florin. "Si e Hotel no keda cla, interes ta sigui core. Interes e aña aki di Beta Hotel mes ta 8 millon, Eagle Beach Hotel ta 8.6 millon, y Plantation Bay ta 5.7 millon," Oduber a bisa.

Hyatt Hotel mientras tanto ta bayendo hopi bon, y no tin riesgo pa garantia. Siman aki Gobierno a ricibi bishita di e persona di mas halto di e compania Japones CITO, y el a musta mas interes pa proyecto na Aruba.

SWAINWHARF NO KIER PAGA Y GOBIERNO TA HAYA COBRANZA DI VAN KESSEL

ORANJESTAD (AAN): Swainwharf no a paga Van Kessel Construction pa e trabaoan haci cu e formacion di tereno riba cual Harbour-Town ta construi, y awor ta Gobierno mester paga!

Esaki ta e revelacion cu Ministro Kelly a haci ayera-mainta durante e Conferencia di Prensa Semanal di Consejo di Ministronan.

Aparentemente Swainwharf, cu tabata e 'brain-child' di Henny Eman, no

por paga Van Kessel pa e trabao aki, y awor Gobierno a ricibi un carta di un abogado di Hulanda unda ta exigí Gobierno pa paga e gastonan aki.

Gobierno lo bay delibera pa check kico por haci cu esaki, pasobra tur cos ta musta cu aki ta trata di un otro dax den wowo. No ta conoci si Van Kessel lo bay saca e santo back for di e tereno ey, si acaso nan no worde paga.

FAYO DI PLACA NA DOMEINBEHEER

Empleado a admiti malversion

ORANJESTAD (AAN) Pa basta tempo caba control lo no a ser teni na Domeinbeheer segun informe, diripiente lo a hiba un control y a bin sali na cla cu falta basta placa cu di un manera o otro lo a somenta.

Un keho a ser entrega recientemente na autoridad y a cuminsa cu investigacion na e departamento ariba menciona. Den e investigacion bista lo a cay riba un dama empleada kende tin algun aña lo ta traha cahera. Pendiente investigacion

recherche a dicidi di detene e dama y mes ora a cuminsa cu intorogacion den rapidamente ela basha abao y admiti su culpabilidad.

Ayera merdia su detenicon a ser prolonga pa hues comisario. Tabata trata di e muher C.O.G. di 36 aña. E caso segun informe ta sigi bao di investigacion profundo pa saca mas datos cu ta posible. Ta ser calcula entre 50 pa 60 mil florin a ser malgasta door di e empleada.

SU EXCELENCIA GOBERNADOR MR. OLINDO KOOLMAN A YEGA ARUBA



Ex Gobernador di Aruba Sr. Felipito Tromp y Señora ta yama Gobernador Mr. Olindo Koolman y Sra. Dora Koolman-Croes un bon bini den presencia di Promer Ministro Oduber y Senora, Mr. Max Croes Gobernador interino y Señora.

ORANJESTAD (AAN) Cu vuelo di KLM Nr. 783 a yega Aruba ayera tardi Su Ex-

celencia, Gobernador di Aruba, Señor Mr. Olindo Koolman acompaña pa su

esposa, Sra. Maria Auxiliadora Koolman-Croes y nan jiuana.

Un ceremonia protocolario impresionante na Aeropuerto Internacional "Reina Beatrix" a ser teni pa yama Gobernador Mr. Olindo Koolman un cordial Bon Bini na Aruba, despues di a hura-menta cerca Su Mahestad "La Reina" na Hulanda. Tanto Hefe di Protocol, Sr. Atan Lee como Adjudant Kapitein Orlando Quandt a aborda e avion pa participa na su Excelencia, Gobernador di Aruba, Mr. Olindo Koolman cu ta cla pa cuminsa cu e ceremonia.

Su Excelencia, Gobernador di Aruba Mr. Olindo Koolman acompaña pa su esposa, Señora Maria Auxiliadora Koolman-Croes a ser ricibi door di Su Excelencia, Gobernador interino Mr. Maximo Croes y esposa, Sra. Sarami Croes-Fingal y su Excelencia, Ministro Presidente di Aruba Sr. Nelson Oduber y su esposa, Sra. Glenda Oduber-Croes pa despues ser dirigi na e podium na unda Orchestra Phi-

harmonico Aruba a interpreta Himno di Hulanda "Wilhelmus" sigui pa e Himno Nacional di Aruba "Aruba Dushi Tera".

Despues di interpretacion di e Himno nan Nacional, Su Excelencia, Gobernador di Aruba Mr. Olindo Koolman, Su Excelencia Gobernador interino Maximo Croes, y Su Excelencia Ministro Presidente, Sr. Nelson Oduber a ser conduci pa e sitio unda Gobernador Mr. Olindo Koolman y su Esposa a ricibi saludo di invitadonan cuminsando cu Su Honorable Presidente di Parlamento di Aruba, Sr. Felix Flanegin y esposa, Sra. Shirley Flanegin-Laurence.

E jovencita Melany Lopez a haci entrega di un ramo di flor na esposa di Gobernador di Aruba, Sra. Maria Auxiliadora Koolman Croes.

Final di e ceremonia protocolario a sigui un recepcion den e sala di salida no 7 - 10 di Aeropuerto Internacional Reina Beatrix, ofreci door di e Consejo di Ministro.